

Kaktusinsleblues

Zweiakter von Cornelia Studer

Schweizerdeutsche Bearbeitung: Alexandra Meuwly

Aufführungsbedingungen

Das Recht zur Aufführung in der Schweiz erteilt ausschliesslich der Theaterverlag Kaliolabusto Etienne Meuwly (www.theaterstuecke.ch) in Messen.

Bei jeder Aufführung vor Publikum ist eine Aufführungsgebühr zu bezahlen und zwar 10 % der Bruttoeinnahmen (aus Eintrittsgeldern, Spenden, Sammlungen, Programmverkäufen etc) mindestens jedoch eine Mindestgebühr pro Aufführung, welche Sie unserer Website entnehmen oder bei uns anfragen können. Dies gilt auch für Wohltätigkeitsveranstaltungen, Aufführungen in geschlossenen Kreisen und Aufführungen ohne Einnahmen.

Wenn dieses Stück aufgeführt wird, müssen A 5 Texthefte entsprechend der Anzahl Rollen gegen Rechnung erworben werden. Unerlaubtes Abschreiben, Fotokopieren oder Vervielfältigen des gesamten Stückes oder auch nur Ausschnitte davon, verstossen gegen das Urheberrecht und sind gesetzlich verboten.

Unerlaubte Aufführungen verstossen gegen das Urheberrecht und sind gesetzlich verboten.

Der Name des Autors und des Bearbeiters muss auf allen Werbeträgern genannt werden. In Programmheften muss zusätzlich der Name des Verlags aufgeführt werden.

Aufführungen von Profi-Bühnen, Bühnen mit Berufsschauspielern oder andere gewerbliche Aufführungen sind nur nach Abschluss eines gesonderten Vertrages mit dem Verlag zulässig. Das Recht der Übersetzung, Verfilmung, Funk- und Fernsehsendung vergibt ausschliesslich der Verlag.

Personen	3 m / 4 w
Heinz Müller	Papuli
Tom Wyss	Reiseberater
Heidi Müller	Frau von Papuli
Nora Bond	Kundin des Reisebüros
Hans Huber	Schildkrötenpfleger
Elsa Krater	Kundin des Reisebüros
Schwester Marlen	Krankenschwester

Bühnenbild

Kulisse 1: Reisebüro. Schreibtisch mit Computer, Drehsessel für Reisebüroleiter, Regale mit Prospekten, ein paar Stühle für die Kunden, Namenschild für Tom.

Kulisse 2: Spitalzimmer.

Inhalt

In einem Reisebüro treffen sich verschiedene Menschen mit verschiedenen Zielen und trotzdem werden sie kurzfristig eine Schicksalsgemeinschaft. Nicht nur der Burnout-Kandidat und Reiseberater, der nicht einmal im Spital Ruhe vor seiner Kundschaft findet, stösst auf ganz neue Grenzen.

1. Akt

(Einige Kunden stöbern in den Regalen. Heinz und seine Frau Heidi sitzen bei Tom dem Kundenberater. Es ist offensichtlich, dass sich da wohl zwei sehr auseinandergeliebt haben)

Heinz: Auso ig möcht uf d Kaktusinsle.

Heidi: Ig möcht nid uf d Kaktusinsle und är büudet sech nume ii dort häre z wöue.

Tom: Aber gnädigi Frou. Ig danke üsi Rundreis, fröhlechs Feschland vo Atabara, mit üsem Usflug uf die atabarische Kaktusinsle, wird ou öich usserordentlech begeischtere.

Heinz: Sie begeischteret sech scho lang für nüt meh.

Tom: De isch die Reis würklech genau s Richtige für öich. Erloschni Füür, bruche mängisch dr Wind vom Nöie. Und genau das Feeling vo Nöiufbruch ab is Abentüür, bietet üsi Reis, wo mir würklech zumene einmalige Priis chöi aabiete.

Heinz: Pauschaltourismus isch nüt für mi.

Tom: D Kaktusinsle eignet sech leider nid für Individualreisendi. Ohni Führrer verlouft me sech uf de Insle sehr schnäu. Usserdäm möcht die atabarische Regierig nid, dass die brüetende Knilchhabichte uf dr Insle gstört wärde. Drum isch e Führrer, wo ufpasst, dass Unbefuegti nid is Bruetgebiet ine trample, Vorschrift.

Heinz: Ig muess aber dringend zwe Wuche ellei uf d Kaktusinsle, für se gnauer chönne z sondiere. Schliesslech wotti nöchschts Jahr ganz dort häre uswandere.

Tom: Das isch leider nid möglich. E duurhafte Ufenthaut vo Mönche het die atabarische Regierig im Wiud-und Pflanzeschutzgebiet verbotte.

Heidi: Gsehsch, ig ha ders gseit.

Heinz: Ig wott aber uf de atabarische Insle nid aus Mönch sondern aus Schüudchrott läbe.

- Tom:** Das tönt intressant. Aber ig cha mir nid vorstöue, wie so öppis müglech isch. *(Nora wendet sich jetzt auch zu der Gruppe am Beratungstisch und mischt sich voller Begeisterung ein)*
- Nora:** Müglech isch es scho, aber doof. Das weiss i us Erfahrig. Ig bi nämlech ir Sändig „Dschungeljohr für ne Star“ gsi. Wo mir dr Showmaster d Speziaufgab gäh het, e Wuche lang ufem Buuch umezschnoogge. Drbi bini im wahrschte Sinn vom Wort flach usecho und d Dschungelchrone hani ou nid übercho. Aber die pensionierte Kunschtturnere, d Andrea Andres ou nid, obwouh sie für z gwünne sogar Spinele gfrässe het.
- Heinz:** Wiene Schüudchrott z läbe, bedüet für mi nid i erschter Linie ufem Buuch z schnogge sondern es nöis Läbestämpe z entdecke.
- Heidi:** So nöi isch das für dä nid, är isch scho immer langsam gsi.
- Nora:** Es isch mängisch ächt müehsam mitere lahme Änte zäme z sii. Im Dschungeljohr hani die Zwöierteamufgabe immer mitem fette Erwin müsse mache, e usdiente Radiomoderator, do isch s Verlüre scho vorprogrammiert.
- Tom:** Wenn dir nüm weit verlüre, reiset dr am beschte mit üs id Ferie. Wär mit üs reist, isch vo Aafang a e Gwünner.
- Nora:** Ig wott meh, aus nume Ferie. Ig makes wie dä Herr hie. Ig Reise zersch einisch zwe Wuche id Ferie, für usezfinge obi a mire Deschtination für immer möcht bliibe.
- Tom:** Ah, dir überleget öich ou, ob dir wöuet uf d Kaktusinsle uswandere?
- Nora:** Nei, ig ha ender a Mallorca oder Ibiza dänkt. Ig wott Bierzäutsängere wärde. Aber wenns uf de Kaktusinsle ou Bierzäut git, chönnti ou dort häre uswandere.
- Tom:** Uf de Kaktusinsle stöh leider keni Bierzäut zur Verfüegig. Aber zum Biispüu z Hawaii gits, ou wenn e aute Liedtext öppis angers bhauptet, Bier. Und wo Bier isch, si meischtens Zäut ou nid auzu wit ewägg.
- Heinz:** Ig gloube Bierzäut uf dr Kaktusinsle ufzstöue, das wär es Verbräche. Das würd die arme Schüudchrött doch

verwirre. (*Jetzt gesellt sich Hans zu den Diskutierenden, denn er fühlt sich persönlich betroffen*)

- Hans:** Entschoudigung, mi Name isch Hans Huber.
- Heidi:** Do müesst dr nech doch nid entschoudige. Es cha jo niemer öppis drfür, wiener heisst.
- Nora:** Mou chame. E richtige Künschtlername bringt eim witer. Aus Nora Bond würd mi jo niemer engagiere, drum heissi jetz Nora Bora Bora.
- Heidi:** Ig bi d Heidi. Heidi Müller, mi Maa het bis geschter no Heinz gheisse. Aber jetz wott er plötzlech Papuli heisse, wüu das für ihn schüudchröttiger tönt. Aber ig gloube nid, dass er dank sim Künschtlername e Star unger de Schüudchrött wird. (*Elsa die bisher abseits stand, eilt herbei und will auch bemerkt werden*)
- Elsa:** Auso, wenn sech hie scho aui vorstöue. Ig bi d Elsa, Elsa Krater, vom Name här würdi äüä ou no uf d Kaktusinsle passe. Die si vulkanisch, oder nid?
- Tom:** Jo d Kaktusinsle si vulkanisch. Ig danke, obschon ig es Namensschiudli ha, stöui mi jetz ou einisch vor. Tom Wyss isch mi Name. So Frou Krater, dir möchtet auso ou uf d Kaktusinsle, wüu die so schön zu öiem Name passe?
- Elsa:** Nei, ig ha viu z vüu Respäkt vor Kaktusstachle. Ig möcht lieber a Wiehnachtsmäret uf Dresden und mir dert es hübsches Räuchermännli choufe.
- Tom:** Bis zur Wiehnachte geits jo no e Momänt.
- Elsa:** Jo, aber ig möcht mi guet vorbereite. Zit für d Vorbereitig ha. Vorfröid isch bekanntlech die schönsti Fröid. Ou wenni nid ufe Wiehnachtsmäret wott uswandere, möchti mi glich scho im Vorus uf die Atmosphäre iistöue.
- Hans:** Entschoudigung.
- Heidi:** Weiter nech scho wider drfür entschoudige, dass dir Huber heisset?
- Hans:** Ig ha mi gar nie wöue entschoudige, dassi Huber heisse. Ig ha nume öppis zum augemeine Gspräch wöue biiträge.

- Elsa:** Das isch rächt so. Me söu sech nie für das entschoudige wome isch und me söu sini Meinig dr Augemeinheit kundtue, dass aui drvo chöi profitiere. Was isch scho wider öii Meinig gsi?
- Hans:** Jo, auso, ig schaffe aus Tierpfleger im auternative Zoo Blümliswil. Drum chani differenzierter übers Thema Bierzäut mit Schüudchrött, jo oder nei, rede. Us Erfahrig weiss, dass sech Schüudchrött ou gärn mou i Zäut ufhaute. D Tier sötte im Augemeine nid auzu starch künschtlech beschallt wärde, mir hei do auerdings einisch e Schüudchrött gha, d Herta, wo bi Musig vom Heino aube bsunders zutroulech isch worde. Drum gohni drvo us, dass me Schüudchrött bi beschränkter Lutsterchi und Duur, dere Bierzäutmusig darf ussetze. Vom Bier säuber, würdi, wüus Aukohou enthautet, ender abrote. D Uswürkig vom Hopfe uf Schüudchrött isch bis jetz no nid beleit. Wüu d Schüudchrött meischtens i Gägende heimisch si, wos der Hopfe nid isch, so sägi, Zäut jo, Bier nei.
- Heidi:** Hesch ghört Heinz? Wenn mou e Schüudchrött bisch, ischs verbii mit dr Suuferei.
- Elsa:** Vom Heino hani ou einisch e Wiehnachtsplatte gah, aber sit d CD's Mode si worde, hani kei Plattespiler meh. Vilicht fingi no sone schöne autmodische ufem Wiehnachtsmäret.
- Hans:** Ig hoffe ufem Märet wärde keni Schüudchrött verchouft. Tier eigne sech nid für Wiehanchtsgschänk. Tier si Läbewäse, keni Sache und Schüudchrött eigne sech nid sonderlech guet für Privathuushäut, wo niemer die gringschti Ahnig vo Zoologii het.
- Tom:** Aha, wüu dr Herr sech brueflech mit Zoologii usenanger setzt, möcht er sicher ou uf d Kaktusinsle, wo Schüudchrött und auerhand Echse heimisch si.
- Hans:** Nei, ig wott ad Mikado Wäutmeischterschaft uf Brüssel.
- Heinz:** Ischs nid e Verschwändig, wenn me mit Schüudchrött so du uf du isch, und me de nid uf d Kaktusinsle geit, sondern uf Brüssel, nume für z gseh, ob sech dört irgendwelchi Stäbli bewege oder nid?
- Hans:** Das gsehni nid so, ou ig bruche Abwächslig. Usserdäm isch Mikado kei Widerspruch zur Schüudchröttkund, d

Schüudchrött hei mir d Gedoud glehrt, woni bim Mikado bruche.

- Elsa:** Aha dir spilet säuber, dir göht nid nume aus Zueschouer?
- Hans:** Jo, ig bi aus Spiler drbi und mache mir sogar Sigeshoffnige. Aber ou wenni nume aus Zueschouer würd goh, wär das keis nume, wüu es ischs Publikum wo dr Meischer treit. Bi angerne Sportarte schreit und tobet s Vouk. Dr Mikadofan isch ruehig und hautet konzentriert dr Schnuuf aa, so dass en Einheit zwüsche Spiler und Fan entscheit.
- Heidi:** De isch mi Maa gliich nid für Schüudchrött geeignet. Dä het kei Gedoud für Mikado.
- Heinz:** Ig hätt Gedoud, wenn du nid so würdsch bschiise.
- Nora:** Bim Dschungelcamp hei aui bschisse ussert ig.
- Elsa:** Ig gloube jede bschiisst mängisch. Ig möcht eigentlech immer ehrlech sii, aber mängisch bschiissi mir säuber öppis vor. Ig gloube das geit übers Ungerbewusstsi.
- Hans:** Aha, sehr intressanti Theorie. Ig gloube Schüudchrött bschisse nie, wüu bi de Schüudchrött s Bewusstsi und s Ungerbewusstsi eis isch.
- Nora:** Isch das wüesseschaftlech erwise, dass bi Schüudchröt s Bewusstsi und s Ungerbewusstsi eis isch? Wenn jo, wie bewiist me de so öppis überhopt?
- Hans:** Gseht dr, das isch ou sone Chrankheit vor hütige Zit. Aues muess bewise sii, drbii isch s Gfüeh doch öppis Wichtigers aus es Indiz.
- Elsa:** Über das chame stritte.
- Heinz:** Me cha über aues stritte, vor auem mini Frou cha über aues stritte.
- Heidi:** Drfür bisch du Konfliktunfähig. Drum wottsch jo ou e Schüudchrött sii.
- Hans:** Schüudchrött si nid Konfliktunfähig, wenni es Biispüu darf bringe.
- Tom:** Mir biete ou Seminarreise a, unger angerem „Konfliktbewältigung in der Ehe“.

- Heinz:** Ig gloube, das bruche mer nüm. Ig weiss gar nid, ob üsi Ehe überhoupt no e Ehe isch.
- Hans:** Genau so ischs ou bi de Riseschüudchröt Arno und Bianca gsi. Nach 120 harmonische Ehejohr, het d Bianca plötzlech immer hüffiger es Zische vo sech gäh, bis sech dr Arno langsam zugg zoge het. Mir hei se de zitewiis i trennte Gheg ghaute, wüu dür lengeri Absänz verchruscheti Struktüre ufbräche und drum d Möglicheit entsteit, sech nöi lehre z könne.
- Elsa:** Sich nöi lehre z könne? Funktioniert das no, we me sech scho 120 Johr könnst het?
- Hans:** We me gwüüt isch usem Chefig vo aute Gwohnheite uszbräche und am angere si Freiruum gönnt, jo.
- Nora:** De herrscht jetz wider Fride, Freud und Eierchueche zwüschem Arno und dr Bianca?
- Hans:** Leider nid. Dr Arno het d Idee usem Chefig vo aute Gwohnheite uszbräche z wörtlech gnöh. Är isch usem Gheg abghoue. Trotz sim normalerwiis gwöhnleche Tämpo, ischs üs bis hüt nid glunge, dr Arno wider iizfoh.
- Tom:** Möcht jetz eine vo de Herrschafte vilicht e Reis bueche?
- Heidi:** Das möchte mir aui, drum si mer jo schliesslech hie.
- Tom:** Ig ha gmeint, dir wöuet nid mit öiem Maa uf d Kaktusinsle uswandere?
- Heidi:** Nume wüui nid mit mim Maa mit wott, muess das jo no lang nid heisse, dassi ellei deheime wott hocke.
- Nora:** Bravo. Bevori bim Dschungelcamp mitgmacht ha, bini e Momänt mitem Bozo zäme gsi. Dir heit doch sicher scho vom Bozo ghört. Är isch Ex-Popstar und Juror ir Sändig „Wer wird die neue Madonna?“ Dä isch ou so ne Macho gsi, wo nid hett wöue, dassi ohni ihn usem Huus goh und dr Press hett er gseit, mir heige üs trennt, wüui keini kaputte Ungerhose chönn flicke. Aber sicher scho chani Ungerhose flicke. Ig has nume nid lohnenswärt gfunge, sini hässleche Tigerpants ou no z stopfe.
- Heinz:** Ig ha nüt drgäge, wens Heidi ohni mi usem Huus geit, und usserdäm träge keni Tigerpants. Wenni settigi anne hät, würdi se garantiert säuber flicke, wenn sie kaputt gienge.

- Heidi:** Würsch sicher nid. Du chasch jo nid emou e Chnopf aanäihe, und dini Jeans muessi ou immer chürze, Mister Churzbei.
- Elsa:** Bi mir chönnt er lehre, wie me e Chnopf aanäiht. Ig gibe nämlech Kürs.
- Nora:** Kürs. „Chnöpf aanäihe für Macho Manne“, dert chönnt me dr Bozo häreschicke.
- Elsa:** Bi mir lehre nid nume Manne, sondern ou Froue, nid nume wie me Chnöpf aanäiht, sondern ou wie me se säuber macht. Ig bi uf traditionelli Ungerwöschnöpf spezialisiert.
- Nora:** Ig träge eigentlech a mire Ungerwösch keni Chnöpf, ig bi Botschafterin für Seamless Ungerwösch, keni Nöht, keni Chnöpf.
- Tom:** Möchte die Dame nid lieber bi sich dehome über Ungerwösch witerrede? Ig verchoufe nämlech hie nid Ungerwösch, nume Reise.
- Elsa:** Dass me dür das Reisebüro keni Ungerwösch cha choufe, stimmt jo gar nid. Letscht Herbscht simer mit öiem Reisebüro uf dr Shoppingfahrt im Schwarzwaud gsi. Dört heimer d Glägeheit gha elektrisch beheizbari, längbeinigi Thermoungerhose z choufe. Ig ha aber keni wöue und ha drum bim Zmittag keis Dessert übercho.
- Tom:** Mir schaffe nimm mit däm Shoppingcar zäme. Es het z vüu Chundebeswärde gäh.
- Heidi:** Ig gloube ig ha einisch ir Zitig vo dämm gläse. Het nid e 95 Jährige Maa, vo dene beheizbare Hose en elektrische Schlag übercho und när die Shoppinggsöschaft verchlagt, wüu er sit denn zügigsunfähig isch?
- Tom:** Dä Fau isch bire angere Firma iiträtte, bi de Shoppingcar Toure hets weniger dramatische Beswärde gäh. Die hei mer auerdings sehr ärnscht gnoh und mir schänke aune wo bim Shoppingcar keis Dessert übercho hei, e Guetschiin für fuf Fruchtjoghurt nach Wauh.
- Elsa:** Ig ha dä Brief mit de Joghurtguetschiine ou überchou, hätt aber do drzue no e Frog.

- Tom:** Ig bi do zum Froge beantworte, insofärn sie nid Ehekrise vo Schüudchrött oder Fäu vo Impotänz, usglöst dür beheizbari Ungerhose, beträffe. Auso froget nume.
- Elsa:** Gäute die Guetschiine ou für Laktosefrei Joghurt?
- Tom:** Naturlech.
- Heidi:** Verträget dir ou keni Laktose?
- Hans:** Das vertreit jo niemer meh und schoud dra si d Heizhosehärstöuer.
- Heidi:** Wie chömet dir de uf das?
- Hans:** Mir hei einisch e Schüudchrött names Aldebaran gha und dä hett öppis, wo üse Tierheilpraktiker für Rheuma ghaute het. Auso het dr Heilpraktiker am Aldebaran es Heizchüssi ungere gschobe. Notabene eis mit dr gliiche Technik, wo ou für heizbari Ungerhose brucht wird. Wüu mir dr Aldebaran usem ne Privathuushaut übernoh hei, woner nid artgrächt ufzoge worde isch, het dr Aldebaran druf bestange, sini aute ungsunge Ernährigsgwohnheite biizbhaute. Schüudchrött si drum wie d Mönche Gwohnheitstier. Dr Aldebaran het auso sini Salatbletter nume mit Sosse wöue. Sit er aber ufem Heizchüssi gsässe isch, het er sis Chrüter-Rahm-Dressing nüm vertreit und ohni Sosse het dr Aldebaran ke Salat wöue. Es isch üs de zum Glück glunge, dr Aldebaran uf italiänischs Dressing umzstöue. Dr Heilpraktiker het sini Lehre drus zoge. Jetz setzt er Tier, woner für Rheuma aafäuig iischtet, nume no uf autmodischi Chirschisteichüssi. Sit denn hei üsi Schüudchrött ou keni Nahrigsmittu Unverträglechkeite meh gha.
- Heidi:** Ig weiss nid, ob wäge däm einte Fau, würklech erwise isch, dass Thermohosetechnik e Laktoseunverträglechkeit uslöst.
- Tom:** Ig chönnt öich Ferie im Huus Widehall aabiete, wo me speziell uf Diätwünsch vo de Gescht iigeit. Laktosefrei, glutenfrei, kosher, halal, vegetarisch, vegan, low Fat, low carb, Rohchoscht. S Huus Widehall het aues im Aagebot.
- Nora:** Ig möcht dört gloub nid häre. Bi Speziaudiät chunnt mir immer d Kimi i Sinn. D Kimi isch d Frou vom Bozo gsi, bevor er mit mir isch zäme cho. Nachdäm är mit mir

zäme isch gsi, isch sie wider d Frou vom Bozo gsi. Im Momänt läbe sie getrennt und sie läbt drvo Interviews über d Zit mit em Bozo z gäh. Sie jommeret, dass sie immer dr Wecker uf die haubi drü Znacht het müesse stöue, wüu sie ihm um die Zit immer e Wurscht het müesse brötle, wüu er Znacht Hunger het. Wenn dir mi froget, isch dä Maa säuber e Wurscht gsi, usserdäm jommeret sie ständig, dass sie drei Monet nume Spiegueier gässe het, wüu dr Bozo gmeint het, wenn sie öppis anders ässi, wärd sie z dick. Dr Bozo het eim no schnäu einisch z dick gfunge, drum hani äxtra fuf Kilo zuegnoh. Das het mire Modukarriere gschadt, aber haub so wiud, s modle isch mir sowiso längwilig worde.

- Heinz:** Ah, die Kimi könni gloub. Natürlech nid persönlech aber vom Färnseh. Macht die nid Wärbig für die String Tangas?
- Heidi:** So öppis chasch dr wider merke, drfür verlürsch jede Iichoufszedu, woni für di schriibe, wüu dr nie chasch merke, was söusch choufe.
- Heinz:** Vilicht verlüri d Iichoufszedle jo nume, wüui ou einisch wott mitbestimme, was bi üs kouft wird.
- Heidi:** Du wottscht mit dere Iichoufsdebatte jo nume drvo ablänke, dass irgendwelche vulgäre Dinger, wie dr Kimi, ufs Hingerteil luegsch, du aute Esu!
- Nora:** D Kimi isch würklech vulgär. Grad für Damewösch z bewärbe brucht me Stil, für nid i Schmudduegge abzdrifte. Aber dr Kimi chas jo egau sii, die isch jo scho i dämm Schmudduegge und passt dort ou super häre.
- Tom:** Bitte sehr, muess hie jede e Debatte zum Thema Dameungerwösch führe?
- Elsa:** S Thema Damewösch schiint öich jo unagnähm z berüehre.
- Hans:** D Wösch isch haut öppis wo äng am Körper lit und vilicht het er jo Problem mit dr Körperlechkeit. Das lit ar luschtfiindleche Erziehig, wo bi kere angere Spezies so vorchunnt, wie bim Mönch. Drum loufe ou au die verchlemnte und vermurgste Gstaute uf de Strosse ume. Ig könne kei einzige Schüudchrott wo Problem mit körperlecher Nöchi het. Usser d Cleo vilicht. Aber vilicht hanget ihri Luschtlosigkeit mit em Auter zäme.

So mit hundertdriissg Johr vergoht eim vilicht scho s
Inträsse a physicher Zuwändig.

- Elsa:** Hans, ig gloube dir tappet grad ine Faue. Ischs nid wider sone anerzogni Hautig, dass me sech mit em Auter nüt meh z wünsche het? Heiter gmerkt, d Heidi het vori am Heinz nid Esu, sondern aute Esu gseit. Das heisst solang er e junge Esu isch gsi, ischs Okay gsi, wenn er de vulgäre Kimis ufs Hingerteil glozt het.
- Heinz:** Ig muess doch bitte. Ig bi kei Esu, weder en aute no e junge.
- Hans:** Nähsts doch nid so persönlech. Jede Maa isch mindischtens einisch i sim Läbe en Esu. Es isch nüt Schlächts en Esu z sii. En Esu fougst sire Natur und Naturlechkeit isch guet.
- Elsa:** Wenn sit de dir s letschte Mou en Esu gsi?
- Hans:** Ig weiss nid. Wenn sit de dir s letschte Mou en Eselin gsi?
- Elsa:** Woni d Kafifahrt mit dr Demonstration vo heizbare Ungerhose buechet ha. Das isch jetz zimlech genau es Johr här.
- Hans:** De isch d Zit wider riiff für ne nöii Eselei.
- Tom:** Dass dir bir nöchschte Reis nümme über Ungerhose müesst nochestudiere, chönnti öich e FKK Reis aabiete.
- Nora:** So öppis würdi nie mache. D Kimi überleit sech bir Färnsehändig „Nackte Wahrheit“ ufzträtte. Die erschiit Talkshow wo d Gescht blutt erschiine. Nume dr Moderator Heinrich Höpfe het e Flöige an.
- Hans:** So öppis fingi unmüglech. Ig wett nie ire Show ufträtte, wo öpper e Flöige muess anne ha.
- Nora:** Ig chönnt mir aber vorstöue, dass öich e Flöige no guet würd stoh.
- Hans:** Ig würd nie e Flöige aallege. Ig finges demüetigend, wenn e Maa es Mäscheli ume Haus muess aallege. Anne Maa e Flöige umzbinge, isch für mi scho so öppis, wie ne symbolischi Kastration.
- Elsa:** Sit dir sicher, dass dir do nid eifach ufene Machomythos ine gheit sit? E Maa mit emne Mäscheli oder mit ere

Flöige cha doch ou männlech usgseh. Dänket doch nume a ehemalig Nachrichtesprächer Klaus Meier.

- Heidi:** Oh ja, dr Meier Klaus. Dä isch würklech sehr maskulin gsi. Me chönnt sogar säge, sexy.
- Heinz:** Aha, wenni die Kimi zur Kenntnis nime, bini en aute Esu, aber du darfsch dä Mäscheli Klaus sexy finge.
- Hans:** Dr Nachrichteklaus isch bi mir keis Thema. Bi Nachrichte ischs jo sowiso Wurscht, ob dr Sprächer sexy isch oder nid. Es chunnt ufe Inhaut aa. Ig finge die Nachrichte sowiso e färngstüüreti Sach, wo einiges wägzensuriert. Wenn bitte sehr, hei die zum letschte Mou e Bricht über notliidendi Schüudchrött brocht?
- Elsa:** Schüudchrött hei eifach nid sone grossi Lobby. Die läbe haut ender unfuffäug, und wär ir hütige Wäut nid uffaut dä hets nid eifach.
- Nora:** Wäm säget dir das. D Kimi isch jo nid die Häuschi. Aber sie faut uf und drum cha sie us auem Gäud mache. Letschthin isch ihres Bikinioberteili, wo sie bir Miss Strandpartywauh anne gha het, im Internet versteigeret worde. Irgend sone Wurscht het drütuusig Franke drfür häre bletteret.
- Heinz:** Wahrschiinlech ischs dr Nachrichtelous gsi, wüu em ufgfaue isch, dass s Bikini s gliiche Muschter wie sini Flöige het.
- Tom:** Flöige aus Haustuech verchoufe mer hie nid, aber wenn dir irgend wo häre wettet flüüge, wäret dir hie genau richtig. Auso, bitte, möcht jetz irgendöpper vo öich e Flug bueche, jo oder nei?
- Elsa:** Ig gloube mit em Car reise oder vilicht mit der Isebahn wär ökologischer.
- Heinz:** Jo scho, aber uf d Kaktusinsle fahrt leider weder e Car no e Isebahn, do muess me scho flüüge.
- Nora:** Ig gloube Zeppelin si ökologischer aus normali Flugzüg.
- Heinz:** Das wär en absolute Chindertroum vo mir, mit em Zeppelin uf d Kaktusinsle.
- ETC ETC**